

Die Gees van God en ons sondige natuur

Galasiërs 5: 13-26

¹³Julle, broers, julle is tot vryheid geroep. Moet net nie julle vryheid misbruik as 'n verskoning om sonde te doen nie, maar dien mekaar in liefde. ¹⁴Die hele wet word in hierdie een gebod saamgevat: “Jy moet jou naaste liefhê soos jouself.” ¹⁵Maar julle byt en verskeur mekaar; pas op dat julle mekaar nie later heeltetal verslind nie.

¹⁶Wat ek bedoel, is dít: Laat julle lewe steeds deur die Gees van God beheers word, dan sal julle nooit swig voor begeertes van julle sondige natuur nie. ¹⁷Wat ons sondige natuur begeer, is in stryd met wat die Gees wil, en wat die Gees wil, is in stryd met wat ons sondige natuur begeer. Hierdie twee staan lynreg teenoor mekaar, en daarom kan julle nie doen wat julle graag wil nie. ¹⁸Maar as julle julle deur die Gees laat lei, staan julle nie meer onder die wet nie.

¹⁹Die praktyke van die sondige natuur is algemeen bekend: onsedelikheid, onreinheid, losbandigheid, ²⁰afgodsdienste, towery, vyandskap, haat, nayswer, woede, rusies, verdeeldheid, skeuring, ²¹afguns, dronkenskap, uitspattigheid en al dergelike dinge. Ek waarsku julle soos ek julle al vroeër gewaarsku het: Wie hom aan sulke dinge skuldig maak, sal nie die koninkryk van God as erfenis verkry nie.

²²Die vrug van die Gees, daarteenoor, is liefde, vreugde, vrede, geduld, vriendelikheid, goehartigheid, getrouheid, ²³nederigheid en selfbeheersing. Teen sulke dinge het die wet niks nie. ²⁴Dié wat aan Christus Jesus behoort, het hulle sondige natuur met al sy hartstogte en begeertes gekruisig. ²⁵Ons lewe deur die Gees; laat die Gees nou ook ons gedrag bepaal. ²⁶Ons moenie verwaand wees, mekaar uittart of op mekaar afgunstig wees nie.

NOTA:

- Opskrifte: (i) Die werke van die vlees en die vrug van die Gees (1933), Die Gees van God en ons sondige natuur (1983), Die Heilige Gees wil gelowiges se lewens regeer (2007), Leef in liefde, leef in die Gees (2022).
- Tot sover in die Galasiërsbrief het Paulus op een gedagte bly fokus: deur die doen van die wet kan 'n mens nie vrygespreek word nie. Die enigste manier is deur geloof

in Jesus Christus. God gee vrypraak as 'n geskenk aan die wat in Jesus Christus glo.

- Paulus het reeds die Galasiërs oorrede om hulle vryheid nie prys te gee nie. Nou roep hy hulle op om hulle vryheid nie te misbruik en sonde te doen deur mekaar nie in liefde te dien nie.
- As jy deur dit wat jy doen of sê iemand anders benadeel, misbruik jy jou vryheid. Jy kan dus nooit jou doen en late motiveer met “omdat ek lus is” nie, want dan word jy 'n slaaf van jou sondige natuur. Die toets van werklike Christelike vryheid in jou verhouding met jou naaste is dat jy jou telkens afvra: Hoe kan ek bewys dat ek die Here se liefde in my eie lewe ervaar?
- Foutsoekerigheid: Dit is mense wat self 'n groot fout het wat dikwels fout soek by ander mense. Wanneer jy ervaar dat God jou foute vergewe, sal jy makliker ander mense hulle foute kan vergewe.
- Daar is net een manier hoe gelowiges dit sal regkry: deur hulle lewe deur die Gees te laat beheers. Deur mekaar met liefde te dien. Die liefde word jou baas! In Grieks word ons nou weer slawe van die liefde. Paulus haal aan uit Levitikus 19: 8.
- Alle mense het van nature slegte en verkeerde begeertes (onsedelikheid, onreinheid, losbandigheid, afgodsdiens, towery, vyandskap, haat, naywer, woede, rusie, verdeeldheid, skeuring, afguns, dronkenskap, uitspattigheid, verwaandheid, mekaar uittart of op mekaar afgunstig wees nie). Wanneer jy jou lewe deur die Gees laat lei, sal jy doelbewus daarteen veg. Indien jy dit nie doen nie, sal jy nie die Ewige Lewe kry nie.
- In 5: 16-19 beskryf Paulus die geestelike oorlog wat daar in elkeen van ons woed. Gelowiges kan dus maklik verskeurd raak tussen die sondige natuur en die Gees.
- Die Gees veroorsaak bepaalde karaktereenskappe, en nie soseer spesifieke handeling nie: liefde, vreugde, vrede, geduld, vriendelikheid, goedhartigheid, getrouheid, nederigheid en selfbeheersing.
- Om Christus na te volg en die voorbeeld wat Hy gestel het self uit te leef kan net gebeur as jy Hom regtig ken en liefhet.